



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

***Komunikado Imprensa***

Periodu : Marsu 2010

Pubikasaun : Marsu 2010

**JSMP Lansa Programa Foun ba “Projeitu Observasaun ba Parlamentu (POP)”**

Programa Monitorizasaun ba Sistema Judisiariu (JSMP) besik tinan sanulu (10) ona hala’o nia knar iha area monitorizasaun ba sistema judicial, advokasia ba direitus umanus no promove nível kumprimentu Povu Timor-Leste ba padroins direitur umanus internasional, partikularmente sira ne’ebe iha relasaun ho julgamentu ne’ebe justu, kredivel, lalais, bratu no asesivel.

Iha tinan ne’e ho apoiu finanseriu hosi USAID liu hosi The Asia Foundation (TAF), JSMP lansa tan programa foun ho naran **“Projeitu Observasaun ba Parlamentu (POP)”**. Projeitu ne’e ho objetivu atu halo observasaun ba Parlamentu no fahe infomasaun ba publiku hodi hasa’e qualidade, transparensia no asesibilidade prosesu legislativu inklui fasilita ba publiku no sosiedade civil atu komprende no partisipa iha prosesu politika lejislativa iha Parlamentu Nasional. Aleinde ne’e, JSMP hanoin katak projetu ne’e sei ajuda deputadu sira atu hala’o komunikasaun diak liu ho sira nia konstituente no hasa’e sira nia koñesementu kona ba importansia ba akuntabilidade, transparensia no konsultasaun iha sistema legislativu.

Mesmu JSMP rekoñese katak durante ne’e iha organizasaun nasional no internasional balun hala’o ona observasaun ba servisu Parlamentu Nasional nian, maibe JSMP hanoin katak prosesu ne’e seidauk rezulta koñesementu no involvmentu diak kona ba prosesu legislativu liu-liu iha nivel baze. JSMP mos hare katak seidauk iha partisipasaun ne’ebé maximu no signifikadu hosi publiku iha prosesu legislativu nian. Tanba ne’e, ho lansamentu POP, JSMP sei haklean liu tan observasaun ba parlamentu nia servisu, nune’e publiku iha oportunidade barak liu hodi asesu no partisipa iha sistema no dinamika prosesu lejislativa iha Parlamentu Nasional.

Projeitu ne'e sei inklui observa plenariu Parlamentu, inkontru komisaun nian, audensia publiku, halo dokumentasaun esbosu lei espesifiku, ne'ebe tuir JSMP nia hare sei fo impaktu bo'ot ba povu nia vida liu-liu komidade sira iha baze atu hatan sira nia nesesidades no observa mos atividade Parlamentar sira seluk. Partikularmente, JSMP hakakak involve publik iha prosesu konsultasaun esbosu lei no lori publik nia aspirasaun atu inkorpora iha esbosu lei sira ne'ebe sei lori impaktu direita ba povu nia moris.

POP sei fasilita publiku no sosiedade civil hodi komprende no partisipa iha prosesu dinamika politika lejislative iha Parlamentu Nasional, liu hosi organiza workshop iha distritu, hasae sira nia koñesementu kona-ba prosesu lejislative ihaParlamentu Nasional no oinsa sira bele involve iha prosesu ne'e. JSMP sei eskolla esbosu lei balun ne'ebe konsidera importante no estratejiku hodi husu komidade nia hanoin kona ba lei ne'e antes aprova no promulga. Prosesu ne'e sei halao liu hosi "Focus Group Discussion (FGD)". Depois de halo tiha konsultasaun iha baze kona ba esbosu lei espesefiku hirak ne'e, JSMP sei organiza no mobiliza representante husi FGD atu mai observa servisu Parlamentu Nasional nian, no bele fo sira nia kontribuisaun direktamente ba prosesu lejislative.

JSMP hein katak, ho lansamentu projeitu foun ne'e bele fo kontribuisaun atu promove valores demokrasia iha Timor Leste, atu nune'e sidadaun hotu iha asesu ba infomasaun kona ba prosesu politika no lejislative no bele partisipa maximu iha prosesu lejislative nu'udar forma ida atu kontribui ba prosesu dezenvolvimentu nasaun.. Aleinde ne'e, JSMP mos hein katak projeitu ne'e bele fasilita deputadu sira hodi resolve sira nia difikuldade atu halo komunikasuan ho sira nia konstituente no fo valor ba povu nia lian nu'udar lian demokrasia ne'ebe ema hotu hahi ne'ebe famoza ho lian: hosi povu; masi hosi povu no fila fali ba povu (dari rakyat, oleh rakyat dan untuk rakyat).

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883